



## ***Sumáriu Kazu: 2013***

Edisaun : Abril 2013

### **Sumáriu kazu julgamentu iha Tribunál Distritál Suai Semana datoluk fulan-Abril 2013**

#### **Introdusaun**

Iha segundu no terseira semana fulan Abril 2013, JSMP monitoriza kazu 6 iha Tribunál Distritál Suai (TDS).

Kazu hirak ne'e kompostu husi kazu violénsia doméstika 1, kazu tentativa omisídiu 2, kazu ofensas integridade física simples 2, no kazu la halo tuir obrigasaun alimentar 1.

Tuir mai deskrisaun sumariu julgamentu kazu kompletu :

#### **1. Kazu krime violénsia doméstika Nú.175/pen/2012/TDS**

Kompozisaun Tribunál : Singulár  
Juis : Dr.Costâncio Barros Basmery  
Ministériu Públiku :Dra.Benvinda da Costa Rosario  
Defeza : Dr. João Henrique de Carvalho  
Konkluzau : Sei kontinua prosesa

Iha 19 Abril 2013, Tribunál Distritál Suai hala'o julgamentu ba kazu violénsia doméstika ho Nú. Prosesu 175/pen/2012/TDS. Arguidu ba kazu ne'e ho inisial FM hasoru vítima ho inisial CDS nu'udar nia fen. Kazu ne'e akontese iha 01 Juñu 2012, iha Aldeia Foho Rua, Distritu Covalima.

Ministériu Públiku katak, iha 01 Juñu 2012, maizumenus tuku 6:00 dader, arguidu tuku dala hat iha vítima nia kotuk laran, basa dala rua iha hasan karuk no tuku iha ulun fatuk.

Vítima deklarata katak arguidu baku nia tanba la kontene ho folin forequeli ne'ebé vítima ba fa'an iha merkadu.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade física simples ho natureza krime violénsia doméstika konjuga ho artigu 35 alinea (b) Lei Kontra Violénsia Doméstika.

Iha alegasaun final, Ministériu Publikú husu tribunál atu kondena arguidu ho pena prizaun tinan 1 maibe suspende ba tinan 3. Alegasaun ne'e bazeia ba produsan provas hatudu katak arguidu komete duni krime ne'ebé Ministériu Publikú akuza ba arguidu.

Defeza husu tribunál atu fó pena ne'ebé justu ba arguidu tanba arguidu ho vítima diak malu, sira hela hamutuk nu'udar fen ho la'en hanesan bai-bain no nunca mosu problema too agora.

Leitura sentesa iha loron 19/04/2013 tuku 10:00 dadersan.

## **2. Kazu krime Tentativa omisídiu Nú.44/pen/2013/TDS**

Kompozisaun Tribunál : Kolektivu  
Juis : Dr. Pedro R.de Figueirera, Dr. Costâncio Barros Basmerry  
no Dra. Florencia Freitas  
Ministériu Públiku : Dr. Felismino Garcia Cardoso  
Defeza : Dr. Joao Henrique de Carvalho  
Konkluzau : Sei kontinua prosesu

Iha 18 Abril 2013, Tribunál Distritál Suai hala'o audiénsia julgamentu ba kazu omisídiu simples ne'ebé rejistu ho Nú. Prosesu:44/pen/2013/TDS. Arguidu ba kazu ne'e ho inisiál MDS hasoru vítima ho inisiál JN. Kazu ne'e akontese iha 23 Janeiru 2009, iha Suco Colimau, Sub-Distritu Bobonaro.

Ministériu Públiku akuza katak iha 23 Abril 2009, arguidu ho katana ida taa vítima nia kabás, iha liman loos, no iha ulun. Aktu ne'e rezulta vítima hetan kanek iha kabas no liman los no hetan bubu iha ulun.

Kazu ne'e akontese tanba vítima la kumpri lia adat tanba ne'e arguidu halo agresaun ne'e hasoru vítima.

Ministériu Públiku akuza arguidu kontra artigu 138 Kódigu Penál kona-ba omisídiu simples.

Iha julgamentu, arguidu deklara katak, iha dader vítima ba iha arguidu nia uma no husu atu tenki rezolve problema. Arguidu la kontente ho prezensa vítima ho nia ezijsia refere tanba antes ne'e sira rezolve tiha ona problema ne'e iha xefe suco nia uma. Tanba ne'e arguidu halo reazem hodi taa vítima.

Ministériu Públiku husu ba iha tribunál atu bele aplika pena ne'ebé adekuada ho arguidu ninia hahalok.

Defeza husu ba tribunál atu aplika pena suspensaun ba arguidu.

Tribunál la termina data fixu ba leitura sentensa ba kazu ne'e.

## **3. Kazu tentativa omisídiu Nú.43/pen/2013/TDS**

Kompozisaun Tribunál : Kolektivu  
Juis : Dr. Costâncio Barros Basmery, Dr Pedro Raposo Figueiredo Dra.  
Florrencia Freitas  
Ministériu Públiku : Dra. Bemvinda da Costa Rosário  
Defeza : Dr. João Henrique de Carvalho  
Konkluzau : Sei kontinua prosesu

Iha 18 Abril 2013, Tribunál Distritál Suai hala'ó julgamentu ba kazu tentativa omisídiu ne'ebé rejsita ho Nú. Prosesu 43/pen/2013/TDS. Arguidu ba kazu ne'e ho inisiál AG hasoru vítima inisiál LEL no PA, ne'ebé akontese iha 8 Marsu 2012, iha Suco Carbau,

Ministériu Públiku akuza katak iha 8 Marsu 2012, arguidu ba iha uma vítima LEL nia uma ho tudik ida sona iha vítima nia rentos. Vítima tauk no hakilar hodi husu ajuda. Iha momentu ne'ebá vítima PA rona no halai mai atu ajuda maibé arguidu mos taa PA nia liman loos no karuk, iha parte kabás no hasan parte loos.

Iha tribunál arguidu deklara katak nia duni mak taa vítima. Maibe arguidu deklara katak nia la iha intenssaun tanba momentu ne'ebá nia sofre hela moras mental.

Iha alegasaun finál Ministériu Públiku husu ba tribunál atu fó pena prizaun tinan 15 ba arguidu maibé kuandu tribunál fó tinan 15 liu ne'e, justu liu tan tan-bá krime ne'ebé arguidu komete hanesan krime ne'ebé todan. .

Defeza husu tribunál atu fó pena tinan 5 iha prizaun tanbá arguidu sofre hela mentál wainhira komete krime ne'e.

Leitura ba sentensa marka fali ba 16 Maiu 2013, tuku 9:00 dader.

#### **4. Kazu krime ofensa ba integridade fízika simples Nú. 197/pen/2012/TDS**

Kompozisaun Tribunál	: Singulár
Juis	: Dr. Costâncio Barros Basmery
Ministériu Públiku	: Dra. Benvinda da Costa Rosario
Defeza	: Dr. Marçal Mascarenhas
Konkluzau	: Absolve

Iha 23 Abril 2013, Tribunál Distritál Suai hala'ó julgamentu ba kazu ofensas integridade fízika simples ho Nú. Prosesu 197/pen/2012/TDS. Arguidu ba kazu ne'e ho inisiál AS, JG, MG, FN hasoru vítima ho inisiál JKM. Kazu ne'e akontese iha 19 Novembru 2011 iha Koitapo, Sub-Distritu Atabae, Distrito Bobonaro.

Ministériu Públiku akuza katak, arguidu nain ha'at baku a vítima nia hirus matan too vítima monu ba rai. Kazu ne'e akontese tanba desintendimentu entre arguidu sira ho vítima iha serimonia festa graduasaun ida.

Ministériu Públiku akuza ho ho artigu 145 Kódigu Penál kona-ba ofensas ba integridade fízika simples.

Arguidu sira deklara katak, loos duni sira lori liman dudu no sikut vítima nia hirus matan halo vítima monu ba rai. Maibé arguidu sira mos deklara katak depois akontese iha tempu ne'e kedas sira diak malu fali no arguidu sira husu diskulpa ona ba vítima. Vítima mos deklara hanesan saida mak arguidu sira hatoo ona antes ba tribunál.

Iha alegasaun final, Ministériu Públiku husu ba tribunál absolve arguidu sira, tanba arguidu sira rekoñese faktu hirak ne'e no sira diak malu ona. Defeza konkorda ho pozisaun Minitieriu Públiku atu absolve arguidu sira husi kazu ne'e.

Leitura ba sentesa marka fali ba iha 23/05/2013 tuku 02:30 lorokraik.

## **5. Krime ofensa ba integridade fízika simples Nú 26/pen/2012/TDS**

Kompozisaun Tribunál :Singular  
Juis :Dr. Pedro Raposo de Figueirera  
Ministériu Públiku :Dr. Jacinto Babo Soares  
Defeza :Dr. Marcal Mascarenhas  
Konkluzau : Absolve

Iha 25 Abril 2013, Tribunál Distritál Suai, prejde julgamentu lee leitura sentensa ba kazu ofensas integridade fízika simples ho Nú. Prosesu 26/pen/2012/TDS. Kazu ne'e involve argudi LM ho RDC hasoru vítima ho MF, ne'ebé akontese iha 25 Abril 2012, iha Suco Kakeu Laletok, Distritu Suai.

Vítima deklara katak arguidu tuku duni nia iha nia matan no halo nia matan bubu. Maibe sira diak malu kedas iha loron tuir mai.

Iha alegasaun finál, Ministériu Públiku husu ba tribunál atu absolve arguidu sira bazeia ba sirkunstansia atenuantes sira ne'ebé produz durante julgamentu. Defeza mos aseita ho pozisaun Ministeriu Públiku nian.

Leitura sentesa marka fali ba iha 25 Abril 2013 tuku 02:30 lorokraik.

## **6. Kazu obrigasaun alimentar Nú. 206/pen/2012/TDS**

Kompozisaun Tribunál : Singular  
Juis : Dra. Florencia Freitas  
Ministériu Públiku : Dr Felismino Garcia Cardoso  
Defeza : Dr. Marcal Mascarenhas  
Konkluzau : Omóloga

Iha 24 Abril 2013, Tribunál Distritál Suai hala'o julgamentu ba kazu la halo tuir obrigasaun alimentar ne'ebé rejista ho Nú. Prosesu 206/pen/2012/TDS. Arguidu ba kazu ne'e ho inisiál RDA hasoru vítima inisiál ELN. Kazu ne'e akontese iha 24 Abril 2012, iha Suai, Distritu Covalima.

Ministériu Públiku akuza katak, arguidu abandona no la tau matan ba nia oan sira, no la halo tuir promesa ne'ebé arguidu promete ona atu fó osan \$ 25.00 kada fulan ba vítima ELN.

Tanba ne'e, Ministériu Públiku akuza arguidu ho artigu 225 Kódigu Penál kona-bala la halo tuir obrigasaun alimentár.

Mesmu nune'e iha tribunál, vítima deklara katak arguidu kumpri ona nia obrigasaun. tanba ne'e, tribunál termina kazu ne'e ho omologasaun ba arguidu.

Leitura sentesa marka fali ba iha 23/05/2013 tuku 10:00 dader.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

telefone: 3323883/77295795

webiste: [www.jsmp.tl](http://www.jsmp.tl)

facebook [www.facebook.com/timorleste.jsmp](https://www.facebook.com/timorleste.jsmp)

twitter: @JSMPTl